



Мирољава Крлеже 1, 76100 Брчко Дистрикт Босне и Херцеговине; Телефон: 049/220 890, Факс: 049/ 212 984,  
Miroslava Kralje 1, 76100 Brčko District Bosne i Hercegovine; Telefon: 049/ 220 890, Fax: 049/ 212 984,

Broj: 02-04-1-571/20

Brčko, 31. 12. 2020. године

На основу člana 110. stav (12) Zakona o budžetu Brčko distrikta Bosne i Hercegovine („Službeni glasnik Brčko distrikta BiH“, broj 34/19), člana 12. Zakona o Direkciji za finansije Brčko distrikta BiH („Službeni glasnik Brčko distrikta Bosne i Hercegovine“, broj: 19/07, 35/17, 03/19 i 34/19), na osnovu Mišljenja Direkcije za finansije Brčko distrikta BiH broj: 02-04.1-1007/20 od 30. 11. 2020. godine, Odjeljenja za evropske integracije i međunarodnu saradnju broj: 02-000355/20 od 10. 12. 2020. godine i Mišljenja Pravobranilaštva broj: M-1214/20 od 14. 12. 2020. godine, uz saglasnost Vlade Brčko distrikta Bosne i Hercegovine, direktor Direkcije za finansije Brčko distrikta BiH d o n o s i

## **PRAVILNIK**

### **o postupku, sadržaju, načinu i uslovima budžetskog nadzora**

#### **Član 1. (Predmet)**

Ovim pravilnikom utvrđuje se postupak, sadržaj, način, uslovi budžetskog nadzora te obavljanje kontrole od strane budžetske inspekcije i izvještavanje o radu budžetske inspekcije.

#### **Član 2. (Područje primjene)**

Odredbe ovog pravilnika primjenjuju se na nadzor nad utroškom budžetskih sredstava od strane budžetskog korisnika, vanbudžetskog fonda i vanbudžetskog korisnika koji je obveznik primjene budžetskog računovodstva (u dalnjem tekstu: subjekt nadzora).

#### **Član 3. (Ciljevi budžetskog nadzora)**

Budžetski nadzor se vrši s ciljem:

- a) utvrđivanja da li je budžet donesen u skladu s odredbama Zakona o budžetu Brčko distrikta Bosne i Hercegovine (u dalnjem tekstu: Zakon o budžetu), odnosno da li je priprema izvršena u skladu s propisanim rokovima i instrukcijama;
- b) utvrđivanja da li je budžet usvojen od nadležnog tijela, te da li je zasnovan na realnim pokazateljima i validnoj dokumentaciji;
- c) utvrđivanja namjenskog trošenja budžetskih sredstava;
- d) utvrđivanja zakonitog utrošaka donacija i grantova od drugih nivoa vlasti;
- e) kontrole pridržavanja zakonskih odredbi pri izvršenju budžeta;
- f) kontrole obračuna izdataka za lična primanja i naknada zaposlenih u skladu s propisima i internim aktima subjekta nadzora;

- g) kontrole zakonitog raspolaganja novčanim sredstvima, s posebnim osrvtom na raspolaganje gotovinom;
- h) kontrole stvorenih obaveza i isplata izdataka koji nisu planirani ili su veći od planiranih;
- i) kontrola isplate izdataka na osnovu validnih knjigovodstvenih isprava;
- j) kontrole obračuna i finansijskih izvještaja;
- k) evidencije stalnih sredstava i drugih pomoćnih knjiga;
- l) kontrole da li su nabavke obavljene u skladu s propisima o javnim nabavkama;
- m) utvrđivanja da li je otpłata dugova vršena u ugovorenem iznosu i utvrđenom roku;
- n) utvrđivanja da li su po izvršenju budžeta u propisanim rokovima sačinjeni odgovarajući finansijski izvještaji, da li su sačinjeni u skladu s propisima i standardima iz te oblasti, te da li su usvojeni od nadležnog organa;
- o) kontrole usklađenosti poslovanja sa zakonskim i drugim propisima.

#### **Član 4.**

##### **(Primjena zakona o upravnom postupku)**

Za dostavljanje svih pismena i ostala pitanja koja se tiču budžetskog nadzora primjenjuje se Zakon o upravnom postupku Brčko distrikta Bosne i Hercegovine (u dalnjem tekstu: Zakon o upravnom postupku).

#### **Član 5.**

##### **(Nadležnost budžetske inspekcije)**

Budžetska inspekcija vrši budžetski nadzor u skladu s članom 110. stav (3) Zakona o budžetu.

#### **Član 6.**

##### **(Uspostavljanje budžetske inspekcije)**

- (1) Budžetska inspekcija uspostavlja se shodno članu 112. Zakona o budžetu.
- (2) Budžetsku inspekciju čine jedan glavni budžetski inspektor i najmanje dva budžetska inspektora.

#### **Član 7.**

##### **(Uslovi za obavljanje poslova glavnog budžetskog inspektora i budžetskog inspektora)**

- (1) Budžetski inspektor, pored općih uslova za zasnivanje radnog odnosa, obavezno ispunjava i posebne uslove:
  - a) stečena diploma visokog obrazovanja u trajanju od najmanje četiri godine, odnosno visoka stručna spremna (VSS) VII koeficijent obrazovanja, minimalno 240 ECTS bodova, ekonomskog ili pravnog smjera;
  - b) da ima najmanje tri godine radnog iskustva nakon sticanja navedene visoke stručne spreme;
  - c) da ima položen ispit za rad u organima uprave ili položen ispit na bilo kojem nivou vlasti pred nadležnim organima u Bosni i Hercegovini u skladu s odredbama Zakona o državnoj službi u organima javne uprave Brčko distrikta BiH;
  - d) poznavanje rada na računaru u programima Word, Excel, internet i elektronska pošta.
- (2) Za glavnog budžetskog inspektora može biti imenovano lice koje, pored uslova iz stava (1) ovog člana, ima najmanje pet godina radnog iskustva.

## **Član 8. (Budžetski nadzor)**

- (1) Budžetski nadzor obuhvata vršenje inspekcijske kontrole, preduzimanje inspekcijskih i drugih mjera i radnji, praćenje i izvršavanje naloženih mjera za otklanjanje utvrđenih nepravilnosti i nezakonitosti.
- (2) Budžetski nadzor obavlja se za tekuću fiskalnu godinu.
- (3) Izuzetno, u slučaju nastanka opravdanih razloga prouzrokovanih određenim specifičnim okolnostima, budžetski nadzor se može obavljati i za protekli period do pet godina.
- (4) Pod specifičnim okolnostima iz stava (3) ovog člana podrazumijevaju se okolnosti koje su nastale na osnovu saznanja i činjenica koje nisu bile poznate u proteklom periodu, a osnovano ukazuju na nepravilnosti u primjeni zakona ili drugih propisa u tom periodu.
- (5) Postupak budžetskog nadzora za protekli period obavlja se po pravilima postupka budžetskog nadzora koji se provodi za tekuću fiskalnu godinu.

## **Član 9. (Predmet kontrole)**

Predmet kontrole budžetske inspekcije je dokumentacija vezana za pripremu, planiranje, način izrade i izvršenje budžeta Brčko distrikta Bosne i Hercegovine, te računovodstvena evidencija i izvještaji.

## **Član 10. (Sukob interesa)**

Budžetski inspektor ne vrši budžetski nadzor u slučaju da postoje neki od oblika sukoba interesa koji su propisani Zakonom o sukobu interesa u institucijama Brčko distrikta Bosne i Hercegovine, Zakonom o državnoj službi u organima javne uprave Brčko distrikta Bosne i Hercegovine i Zakonom o upravnom postupku.

## **Član 11. (Redovni i vanredni budžetski nadzor)**

- (1) Redovan budžetski nadzor vrši se na osnovu mjesecnog i godišnjeg plana budžetskog nadzora.
- (2) Vanredni budžetski nadzor vrši se po potrebi.
- (3) Inicijativa za vanredni budžetski nadzor može biti:
  - a) prijava fizičkog ili pravnog lica;
  - b) zaključak Vlade Brčko distrikta Bosne i Hercegovine ili Skupštine Brčko distrikta Bosne i Hercegovine;
  - c) zahtjev odgovornog lica subjekta nadzora;
  - d) zahtjev glavnog budžetskog inspektora i budžetskog inspektora.

## **Član 12. (Sadržaj naloga za budžetski nadzor)**

Nalog za budžetski nadzor sadrži:

- a) naziv organa koji vrši budžetski nadzor, broj i datum;
- b) pravni osnov;
- c) procijenjeni rizik;
- d) ime i prezime budžetskog inspektora koji će vršiti inspekcijsku kontrolu;
- e) broj službene legitimacije budžetskog inspektora koji vrši kontrolu;
- f) naziv subjekta inspekcijske kontrole;
- g) predmet inspekcijske kontrole;
- h) datum početka vršenja kontrole i planirano vrijeme u kome će se inspekcijska kontrola obavljati;
- i) potpis glavnog budžetskog inspektora;

- j) potpis direktora Direkcije za finansije Brčko distrikta Bosne i Hercegovine (u dalnjem tekstu: Direkcija);
- k) pečat Direkcije.

### **Član 13. (Godišnji plan budžetskog nadzora)**

Godišnji plan budžetskog nadzora se zasniva na sljedećim indikatorima:

- 1) Prijedlog godišnjeg plana budžetskog nadzora priprema glavni budžetski inspektor.
- 2) Osnov za izradu prijedloga godišnjeg plana predstavljaju raspoloživi podaci od organa uprave i institucija Brčko distrikta Bosne i Hercegovine koji se koriste za procjenu rizika o poštovanju propisa i eksternih informacija.
- 3) Prijedlog godišnjeg plana budžetskog nadzora obavezno sadrži:
  - a) procentualni udio budžetskih nadzora prema obimu (cjelovitog, djelimičnog i *ad hoc* budžetskog nadzora) u procentima, posebno za svakog subjekta nadzora;
  - b) za svaki predmet budžetskog nadzora planirani broj inspektora po obimu i vrsti inspekcijske kontrole (vrsta kontrole / broj inspektora);
  - c) broj dana po vrstama budžetskog nadzora (vrsta budžetskog nadzora / broj dana za budžetski nadzor);
  - d) ukupan broj budžetskih nadzora pojedinačno za svakog subjekta nadzora.
- 4) Prijedlog godišnjeg plana budžetskog nadzora glavni budžetski inspektor dostavlja direktoru Direkcije na usvajanje najkasnije do 15. decembra tekuće godine za narednu godinu.
- 5) Direktor Direkcije je dužan do 31. decembra tekuće godine razmotriti i usvojiti godišnji plan budžetskog nadzora za narednu godinu.

### **Član 14. (Mjesečni plan budžetskog nadzora)**

- (1) Plan pojedinačnih mjesečnih kontrola kreira se na osnovu pokazatelja iz člana 14. stavova (2) i (3), utvrđenih kriterija rizika, zahtjeva organa javne uprave i institucija za budžetski nadzor, kao i informacija kojim budžetska inspekcija raspolaze, a relevantne su za provođenje budžetskog nadzora.
- (2) Zahtjevi tužilaštva i drugih institucija za finansijskim i sličnim kontrolama se dostavljaju direktoru Direkcije na signiranje u skladu s propisima o kancelarijskom poslovanju, a direktor te zahtjeve prosljeđuje glavnom budžetskom inspektoru na daljnje postupanje.
- (3) Budžetski nadzor po zahtjevima iz stava (2) ovog člana imaju prioritet.
- (4) Prijedlog mjesečnog plana budžetskog nadzora izrađuje glavni budžetski inspektor i dostavlja direktoru Direkcije na usvajanje do 15-og u tekućem mjesecu za naredni mjesec.
- (5) Direktor Direkcije je dužan razmotriti i usvojiti mjesečni plan budžetskog nadzora do 25-og tekućeg mjeseca za naredni mjesec.
- (6) Mjesečni plan budžetskog nadzora sadrži:
  - a) naziv subjekta nadzora koji je planiran kao predmet kontrole;
  - b) vrstu budžetskog nadzora;
  - c) ime i prezime budžetskog inspektora ili tima budžetskih inspektora koji provode budžetski nadzor.

### **Član 15. (Postupanje s dostavljenim nalogom za budžetski nadzor)**

- (1) Po dobijanju naloga za budžetski nadzor, budžetski inspektor obavještava odgovorno lice koje rukovodi subjektom nadzora kod koga se obavlja budžetski nadzor o datumu otpočinjanja kontrole, obavezi pribavljanja relevantne dokumentacije i podataka neophodnih za kontrolu, obavezi prisustva računovode i lica odgovornog za izvršenje budžeta, vremenu trajanja kontrole i slično.
- (2) Prije početka kontrole, budžetski inspektor dužan je izvršiti pripremu, odnosno osigurati

dokumentaciju o prethodnoj kontroli, revizijski izvještaj Ureda za reviziju javne uprave i institucija u Brčko distriktu Bosne i Hercegovine ukoliko je revizija izvršena, i drugu potrebnu i dostupnu dokumentaciju.

### **Član 16. (Kontrola dokumentacije)**

(1) Kontrola dokumentacije može trajati najviše deset radnih dana, a po zahtjevu budžetskog inspektora i uz odobrenje glavnog budžetskog inspektora, ovaj rok direktor Direkcije može produžiti najviše za deset radnih dana.

(2) Budžetski inspektor može u postupku kontrole uzeti pismenu izjavu od odgovornih lica subjekta nadzora i drugih lica subjekta nadzora s ciljem utvrđivanja činjenica koje na drugi način nije mogao utvrditi.

(3) Izjava iz stava (2) ovog člana prilaže se uz zapisnik o izvršenoj kontroli u spis predmeta.

### **Član 17. (Zaključak i rješenje u postupku)**

U postupku budžetskog nadzora inspektor donosi zaključak i rješenje shodno Zakonu o upravnom postupku.

### **Član 18. (Rješenje)**

Nakon inspekcijske kontrole, ukoliko utvrdi nepravilnosti, budžetski inspektor donosi rješenje o mjerama, radnjama i rokovima za otklanjanje nepravilnosti.

### **Član 19. (Zapisnik o inspekcijskoj kontroli)**

(1) O svakoj inspekcijskoj kontroli budžetski inspektor sačinjava zapisnik o inspekcijskoj kontroli u kojem se navodi činjenično stanje utvrđeno inspekcijskim pregledom.

(2) Izuzetno, ako zbog obima, složenosti ili prirode inspekcijskog nadzora ili zbog drugih okolnosti, nije moguće na licu mjesta sačiniti zapisnik u toku inspekcijskog pregleda, zapisnik se sačinjava u službenim prostorijama budžetske inspekcije (ili subjekta nadzora) istog dana kada je završena inspekcijska kontrola.

(3) Zapisnik se sastavlja jasno i čitko.

(4) Zapisnik se sačinjava shodno Zakonu o upravnom postupku.

### **Član 20. (Službena zabilješka)**

O manjim nepravilnostima, koje su u toku inspekcijskog pregleda otklonjene, kao i o drugim pitanjima koja se ne konstatuju zapisnikom o inspekcijskom pregledu, budžetski inspektor sačinjava službenu zabilješku.

### **Član 21. (Ukazivanje na nepravilnosti)**

Ako se u zapisniku o izvršenoj inspekcijskoj kontroli konstatuju povrede, odnosno nepravilnosti u primjeni zakona, budžetski inspektor dužan je da u roku od deset radnih dana od dana dostavljanja zapisnika subjektu nadzora, donijeti rješenje kojim mu nalaže otklanjanje utvrđenih povreda.

## **Član 22.**

### **(Postupanje u slučaju postojanja osnova sumnje da je počinjeno krivično djelo)**

- (1) Ako u postupku kontrole budžetski inspektor utvrdi da činjenice i okolnosti ukazuju na postojanje osnova sumnje da je izvršeno krivično djelo, dužan je sačini službenu zabilješku i obavještenje i da ih s pribavljenim dokazima, bez odlaganja dostaviti nadležnom tužilaštvu.
- (2) Ako postoje osnovi sumnje da je izvršeno krivično djelo za koje je propisana kazna zatvora preko pet godina, budžetski inspektor je dužan da bez odlaganja obavijesti tužioca i pod njegovim nadzorom preduzimati dalje potrebne radnje.
- (3) Nakon preduzimanja neophodnih radnji za potrebe vođenja krivičnog postupka, budžetski inspektor nastavlja i okončava postupak budžetske kontrole, izuzev ako nadležni tužilac zatraži da se postupak kontrole prekine ili obustavi iz razloga i u interesu vođenja krivičnog postupka.

## **Član 23.**

### **(Prekršajni nalog)**

- (1) Kada se u postupku kontrole utvrdi da je odgovorno lice kod subjekta nadzora počinilo prekršaj iz oblasti propisa čiju primjenu kontroliše budžetska inspekcija, budžetski inspektor pokreće prekršajni postupak u skladu sa Zakonom o prekršajima Brčko distrikta Bosne i Hercegovine (u dalnjem tekstu Zakon o prekršajima).
- (2) Prilikom odlučivanja o prekršajnom postupku, budžetski inspektor dužan je prekršajni postupak pokrenuti u zakonskom roku.

## **Član 24.**

### **(Izvještavanje)**

- (1) Izvještaj o radu i rezultatima rada budžetske inspekcije sačinjava se najmanje dva puta godišnje i dostavlja se direktoru Direkcije.
- (2) Izvještaji po pravilu sadrže podatke o planiranom i izvršenom broju kontrola, utvrđene nepravilnosti, preduzete mjere za otklanjanje nepravilnosti i nezakonitosti, te prijedloge i mjere za daljnje unapređivanje rada budžetske inspekcije.

## **Član 25.**

### **(Obustavljanje postupka budžetskog nadzora)**

Ukoliko budžetski inspektor u toku vršenja budžetskog nadzora utvrdi da kod subjekta nadzora ne postoje nepravilnosti niti osnove sumnje o počinjenom prekršaju ili krivičnom djelu, zaključkom obustavlja postupak budžetskog nadzora.

## **Član 26.**

### **(Asistencija Policije)**

Budžetski inspektor u toku budžetskog nadzora može zatražiti pomoć ovlaštenih službenih lica Policije Brčko distrikta Bosne i Hercegovine (u dalnjem tekstu: Policija), ako:

- a) bude spriječen upotrebom fizičke ili druge sile;
- b) procijeni da bi moglo doći do fizičkog ili drugog otpora.

## **Član 27.**

### **(Saradnja drugih institucija i stručnjaka)**

Budžetski inspektor može u postupku inspekcijskog nadzora da zatraži mišljenje i saradnju ovlaštenih stručnih institucija, odnosno odgovarajućih ovlaštenih stručnjaka, ako je to potrebno radi pravilne ocjene činjeničnog stanja.

**Član 28.**  
**(Uzimanje uzorka)**

Budžetski inspektor može uzimati uzorke ako je u postupku inspekcijskog nadzora potrebno utvrditi da li proizvodi koji su bili predmet javne nabavke odgovaraju propisanom i deklarisanom sastavu, odnosno kvalitetu.

**Član 29.**  
**(Postupak uzimanja uzorka)**

Prilikom uzimanja uzorka budžetski inspektor je dužan:

- a) pod istim uslovima i u isto vrijeme uzeti tri uzorka u količini potrebnoj za ispitivanje i to:
  - 1) jedan uzorak za prvu analizu,
  - 2) jedan uzorak subjektu nadzora,
  - 3) jedan uzorak za superanalizu;
- b) sačiniti zapisnik o uzimanju uzorka;
- c) uzorke zapečatiti i propisano označiti;
- d) dostaviti uzorak za prvu analizu bez odlaganja ovlaštenoj instituciji na vještačenje, a uzorak za superanalizu čuvati na propisan način;
- e) bez odlaganja pismeno obavijestiti subjekat nadzora o rezultatima analize;
- f) na zahtjev subjekta nadzora bez odlaganja dostaviti uzorak na superanalizu drugoj ovlaštenoj instituciji.

**Član 30.**  
**(Stupanje na snagu)**

Ovaj pravilnik stupa na snagu osmog dana od dana objavljivanja u „Službenom glasniku Brčko distrikta BiH”.

**Direktor Direkcije za finansije**

---

Mato Lučić, dipl. oec.

